

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O IZMJENAMA I DOPUNAMA
ZAKONA O POLJOPRIVREDNIM SAVJETODAVNIM SLUŽBAMA**

Sarajevo, oktobar, 2020. godine

ZAKON
O IZMJENAMA I DOPUNAMA
ZAKONA O POLJOPRIVREDNIM SAVJETODAVNIM SLUŽBAMA

Član 1.

U Zakonu o poljoprivrednim savjetodavnim službama („Službene novine Federacije BiH“, broj 66/13) u članu 4. u stavu (1) riječ: „dugoročnom“ zamjenjuje se riječju: „srednjoročnom“, a riječ: „pet“ zamjenjuje se riječju: „sedam“.

Član 2.

U članu 6. u stavu (5) riječi: „svaki u okviru svojih nadležnosti, osim poljoprivrednika koji upravlja odnosnim gazdinstvom uz izuzetak nepravilnosti ili kršenja utvrđenih obavljanjem djelatnosti“ zamjenjuju se riječima: „uz izuzetak nepravilnosti i kršenja propisa, utvrđenih u upravljanju poljoprivrednim gazdinstvom“.

Član 3.

U članu 8. iza stava (2) dodaju se novi st. (3) i (4) koji glase:

„(3) Federalni ministar donosi srednjoročni program rada javne poljoprivredne savjetodavne službe u Federaciji za period od tri godine, kao i godišnji program rada javne poljoprivredne savjetodavne službe u Federaciji.

(4) Za poslove izrade programa iz stava (3) ovog člana, federalni ministar imenuje komisiju od predstavnika Federalnog ministarstva poljoprivrede i predstavnika kantonalnih poljoprivrednih savjetodavnih službi na period od tri godine.“

Član 4.

U članu 9. u stavu (2) riječ: „dugoročnog“ zamjenjuje se riječju: „srednjoročnog“.

Član 5.

U članu 13. iza stava (1) dodaje se novi stav (2) koji glasi:

„(2) Poslovi iz stava (1) ovog člana biće utvrđeni srednjoročnim i detaljno razrađenim godišnjim programom rada javne savjetodavne službe, na osnovu kojih će da budu planirana potrebna finansijska sredstva.“

Član 6.

U članu 16. u stavu (1) riječi: „imaju registrovanu privatnu savjetodavnu službu, oblik privrednog društva ili zadruga za poslove savjetodavne službe“ zamjenjuju se riječima: „imaju registrovano privredno društvo ili zadrugu sa osnovnom djelatnošću savjetovanja u području poljoprivrede i dopunskim djelatnostima u skladu sa odredbama ovog Zakona“.

Stav (3) se briše.

Član 7.

U članu 17. u stavu (2) riječi: „Na osnovu rješenja iz stava 1. ovog člana“ zamjenjuju se riječima: „Po dobivanju licence iz člana 16. stav (1) ovog Zakona“.

U stavu (4) riječi „objavljuje se u Službenim novinama Federacije BiH“ zamjenjuju se riječima „nalazi se na službenoj web stranici Federalnog ministarstva“.

Član 8.

U članu 18. u stavu (4) riječi: „objavljuje se u Službenim novinama Federacije BiH“ zamjenjuju se riječima: „nalazi se na službenoj web stranici Federalnog ministarstva“. Stav (5) mijenja se i glasi: „(5) Organizovanje i izvođenje obuke iz člana 19. st. (1) i (2) ovog Zakona, način i uslove polaganja stručnog ispita iz člana 15. stava (2) ovog Zakona, visinu naknade, obrazac sertifikata savjetodavca, uslove koje moraju ispunjavati visokoškolske ustanove i/ili stručne upravne organizacije kojima se povjerava javno ovlaštenje za obavljanje poslova obuke, način provjere njihove ispunjenosti, provođenja stručnog ispita i izdavanja sertifikata za poljoprivrednog savjetodavca, te sadržaj i način vođenja Registra savjetodavaca iz člana 18. ovog Zakona propisuje federalni ministar posebnim propisom.“

Član 9.

Član 19. mijenja se i glasi:

„Član 19.

- (1) Fizička lica koja podnesu zahtjev za pohađanje obuke, polaganje stručnog ispita i dobivanje sertifikata za poljoprivrednog savjetodavca obavezna su da prođu teoretsku i praktičnu obuku u skladu s Programom teoretske i praktične obuke za certifikovanje poljoprivrednih savjetodavaca, koji donosi federalni ministar za period od 5 godina, nakon čega stiču pravo polaganja stručnog ispita radi dobivanja sertifikata za poljoprivrednog savjetodavca.
- (2) Za poslove izrade programa iz stava (1) ovog člana federalni ministar imenuje komisiju od predstavnika Federalnog ministarstva i predstavnika visokoškolskih ustanova i/ili stručnih upravnih organizacija u Federaciji registrovanih za djelatnost obrazovanja u poljoprivredi.
- (3) Certifikovani savjetodavci u svrhu permanentnog sticanja znanja prolaze obaveznu obuku jednom u tri godine, u skladu sa Programom obavezne obuke poljoprivrednih savjetodavaca, koji donosi federalni ministar.
- (4) Za poslove izrade programa iz stava (3) ovog člana, federalni ministar imenuje komisiju od predstavnika Federalnog ministarstva i predstavnika visokoškolskih ustanova i/ili stručnih upravnih organizacija u Federaciji registrovanih za djelatnost obrazovanja u poljoprivredi.
- (5) Naknade troškova obuke iz st. (1) i (3) snose podnosioci zahtjeva, dok za službenike javnih savjetodavnih službi troškove snosi organ u kojem su ti službenici uposleni.“

Član 10.

Član 20. mijenja se i glasi:

„Član 20.

- (1) Organizacija i provođenje Programa teoretske i praktične obuke za certifikovanje poljoprivrednih savjetodavaca, polaganje stručnog ispita i izdavanje certifikata i organizacija i provođenje Programa obavezne obuke poljoprivrednih savjetodavaca je u nadležnosti Federalnog ministarstva.
- (2) Poslove iz stava (1) ovog člana Federalno ministarstvo može povjeriti visokoškolskim ustanovama i/ili stručnim upravnim organizacijama u Federaciji registrovanim za obrazovanje u poljoprivredi, a u skladu sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05).
- (3) Obuka se organizuje u vidu predavanja, obuke na daljinu putem interneta, praktične nastave, vježbi izrade poslovnih planova, izrade programa i projekata, vođenja poljoprivrednog knjigovodstva i sl., zavisno od oblasti za koju se savjetodavac specijalizuje.“

Član 11.

Član 22. mijenja se i glasi:

„Član 22. Inspekcijski nadzor

- (1) Inspekcijski nadzor u provedbi ovog Zakona vrši federalna poljoprivredna inspekcija organizovana u Federalnoj upravi za inspekcijske poslove i kantonalne poljoprivredne inspekcije organizovane u okviru kantonalnih organa za inspekcijske poslove.
- (2) Inspekcijski nadzor se vrši u skladu sa Zakonom o organizaciji organa uprave u Federaciji Bosne i Hercegovine ("Službene novine Federacije BiH" broj 35/05), zakonima o inspekcijama kantona i Zakonu o inspekcijama Federacije BiH ("Službene novine Federacije BiH" broj 73/14) - (u daljem tekstu: Zakon o inspekcijama).“

Član 12.

Član 24. mijenja se i glasi:

„Član 24.

- (1) U provedbi inspekcijskog nadzora nad primjenom ovog Zakona i propisa donesenih na osnovu njega federalni poljoprivredni inspektor ovlašten je da:
 - a) nadzire provedbu i primjenu ovog Zakona i propisa donesenih na osnovu ovog Zakona;
 - b) vrši inspekcijski nadzor nad radom privatnih savjetodavnih službi i naređuje zabranu vršenja poslova savjetodavne djelatnosti pravnim licima koja nemaju dozvolu za rad (licencu) i koja nisu upisana u Registar službi, odnosno koja u radnom odnosu nemaju certifikovane savjetodavce;

- c) vrši inspekcijski nadzor nad radom savjetodavaca u privatnim savjetodavnim službama i naređuje zabranu vršenja poslova savjetodavne djelatnosti fizičkim licima koja nemaju certifikat i nisu upisana u Registar savjetodavaca;
 - d) kontroliše da li se namjenski koriste sredstva za provedbu aktivnosti iz godišnjeg programa rada javne savjetodavne službe, koje se na osnovu člana 13. Zakona finansiraju iz Budžeta Federacije – Federalnog ministarstva;
 - e) nadzire i ostale poslove propisane ovim Zakonom;
 - f) obavlja sve poslove i zadatke u nadležnosti kantonalne poljoprivredne inspekcije ukoliko ova i iz bilo kojeg razloga ne izvršava poslove i zadatke utvrđene ovim Zakonom i propisima donesenim na osnovu njega.
- (2) Ukoliko utvrdi da je povrijeđen ovaj Zakon ili drugi propis donesen na osnovu njega, federalni poljoprivredni inspektor ima pravo i obavezu da:
- a) rješenjem naredi otklanjanje utvrđenih nedostataka, odnosno nepravilnosti u određenom roku;
 - b) podnese nadležnom organu zahtjev za pokretanje prekršajnog postupka;
 - c) preduzme i druge mjere, odnosno obavlja druge radnje za koje je ovlašten Zakonom o inspekcijama.
- (3) U provedbi inspekcijskog nadzora nad primjenom ovog Zakona i propisa donesenih na osnovu njega kantonalni poljoprivredni inspektor je ovlašten da:
- a) vrši inspekcijski nadzor nad radom upravnih organizacija - zavoda i agencija za pružanje stručnih usluga u poljoprivredi vezano za poslove koji se odnose na savjetodavnu djelatnost;
 - b) vrši inspekcijski nadzor nad radom savjetodavaca u kantonalnim savjetodavnim službama i naredi zabranu vršenja poslova licima koja nemaju certifikat i nisu upisana u Registar savjetodavaca;
- (4) Ukoliko utvrdi da je povrijeđen ovaj Zakon ili drugi propis donesen na osnovu njega, kantonalni poljoprivredni inspektor ima pravo i obavezu da:
- a) rješenjem naredi otklanjanje utvrđenih nedostataka, odnosno nepravilnosti u određenom roku;
 - b) podnese nadležnom organu zahtjev za pokretanje prekršajnog postupka;
 - c) preduzme i druge mjere, odnosno obavlja druge radnje za koje je posebnim propisima ovlašten.
- (5) Protiv rješenja kantonalnog poljoprivrednog inspektora iz stava (4) tačke a) ovog člana može da se uloži žalba Federalnoj upravi za inspekcijske poslove u roku od osam dana od dana prijema rješenja.
- (6) Protiv rješenja federalnog poljoprivrednog inspektora iz stava (2) tačke a) ovog člana može da se uloži žalba Federalnom ministarstvu u roku od osam dana od dana prijema rješenja.“

Član 13.

Ovaj Zakon stupa na snagu osmog dana od dana objave u Službenim novinama Federacije BiH.

O B R A Z L O Ž E N J E

I USTAVNI OSNOV

Ustavni osnov za donošenje Zakona o izmjenama i dopunama Zakona o poljoprivrednim savjetodavnim službama sadržan je u odredbi tačke c.) Amandmana VIII na Ustav Federacije Bosne i Hercegovine, prema kojoj je u isključivoj nadležnosti Federacije utvrđivanje ekonomske politike, uključujući planiranje i obnovu, te politika korištenja zemljišta na federalnom nivou.

II RAZLOZI DONOŠENJA ZAKONA

Razlozi za donošenje Zakona o izmjenama i dopunama Zakona o poljoprivrednim savjetodavnim službama („Službene novine Federacije BiH“ broj, 66/13) (u daljem tekstu: Zakon) su slijedeći:

U 2017. godini izrađena je Srednjoročna strategija pružanja savjetodavnih usluga (2017. – 2021.) i konstatovano je da ista ne može biti puštena u dalju proceduru, jer je u članu 4. stav (1) utvrđeno da se Srednjoročna strategija pružanja savjetodavnih usluga donosi na period od pet godina, a u stavu (4) istog člana propisano je da se ista donosi na period od sedam godina. Greška je nastala prilikom ugradnje amandmana na Prijedlog zakona o poljoprivrednim savjetodavnim službama. Prijedlogom zakona o poljoprivrednim savjetodavnim službama predviđeno je donošenje predmetne Strategije na period od 5 godina, ali je prihvaćen amandman da se ista donosi na period od 7 godina, što je ugrađeno u stav (4) član 4., ali nisu izvršene izmjene u stavu (1) istog člana. Ovim se ispravlja tehnička greška nastala prilikom ugradnje amandmana.

Osim toga, bilo je potrebno uskladiti naziv srednjoročnog programa rada javne poljoprivredne savjetodavne službe u Federaciji BiH, koji se navodi u tri člana: čl. 1.; čl. 8. i čl. 9., ali pod različitim nazivima.

Odredbu člana 6. stav (5) bilo je potrebno stilski i jezički urediti, ne mijenjajući smisao odredbe.

U 2015. godini donesen je Pravilnik o obuci, certifikatu i registru poljoprivrednih savjetodavaca („Službene novine Federacije BiH“, broj 38/15) i Pravilnik o načinu i postupku izdavanja licence, upisu i vođenju podataka u registru poljoprivrednih savjetodavnih službi („Službene novine Federacije BiH“, broj 38/15). U toku njihove izrade uočeno je da su propisane procedure organizovanja i izvođenja teoretske i praktične obuke za certifikovanje savjetodavaca i redovne godišnje obuke poljoprivrednih savjetodavaca teško provodljive, na što je u postupku izrade naprijed navedenih podzakonskih akata ukazao i Ured za zakonodavstvo Vlade F BiH i usklađenost sa propisima EU. To je posebno uočeno u postupku donošenja Programa teoretske i praktične obuke za certifikovanje i Programa obavezne godišnje obuke certifikovanih savjetodavaca. Predloženim izmjenama i dopunama otklonjeni su uočeni nedostaci u važećem Zakonu. Donošenjem Zakona o izmjenama

i dopunama Zakona o poljoprivrednim savjetodavnim službama stvoriće se pravni preduslovi za uspostavljanje sistema certifikacije i registracije poljoprivrednih savjetodavaca i registracije privatnih poljoprivrednih savjetodavnih službi.

Vlada Federacije BiH je na 90. sjednici održanoj 10.02.2017. godine donijela Zaključak V. broj: 213/2017, sačinjen na osnovu Izvještaja Komisije za izradu liste federalnih propisa, formirane u skladu sa tačkom 6. Zaključka Vlade Federacije BiH V. broj: 1924/2016 od 20.10.2016. godine, u kojem su utvrđeni nedostaci u Zakonu o poljoprivrednim savjetodavnim službama („Službene novine Federacije BiH“ broj: 66/13). Federalna uprava za inspekcijske poslove dala je prijedlog za otklanjanje uočenih nedostataka.

III OBRAZLOŽENJE POJEDINIH ODREDBI

Članom 1. Zakona o izmjenama i dopunama Zakona o poljoprivrednim savjetodavnim službama usklađuje se naziv programa rada javne poljoprivredne savjetodavne službe, koji se donosi na period od tri godine s tekstom važećeg Zakona. Također se usklađuje period na koji se donosi Srednjoročna strategija pružanja savjetodavnih usluga.

Članom 2. Zakona o izmjenama i dopunama Zakona o poljoprivrednim savjetodavnim službama jezički se uređuje odredba važećeg Zakona po kojoj su vršioци savjetodavne djelatnosti dužni da obezbijede tajnost ličnih ili pojedinačnih podataka do kojih dođu u posjed pružajući savjetodavne usluge, na način da se ne mijenja smisao odredbe.

Članom 3. Zakona o izmjenama i dopunama Zakona o poljoprivrednim savjetodavnim službama uređuje se donošenje srednjoročnog programa rada javne poljoprivredne savjetodavne službe u Federaciji BiH, kao i godišnjeg programa rada javne poljoprivredne savjetodavne službe u Federaciji BiH. Ovo je bitno zbog činjenice što će ovi programi biti osnova za planiranje sredstva za rad javne poljoprivredne savjetodavne službe.

Članom 4. Zakona o izmjenama i dopunama Zakona o poljoprivrednim savjetodavnim službama usklađuje se naziv programa rada javne poljoprivredne savjetodavne službe, koji se donosi na period od tri godine s tekstom važećeg Zakona.

Članom 5. Zakona o izmjenama i dopunama Zakona o poljoprivrednim savjetodavnim službama preciznije se utvrđuje način određivanja poslova iz člana 13. važećeg Zakona, a u cilju planiranja potrebnih finansijskih sredstava.

Članom 6. Zakona o izmjenama i dopunama Zakona o poljoprivrednim savjetodavnim službama preciznije je određena djelatnost privrednog društva ili zadruge, koje će vršiti poslove privatne poljoprivredne savjetodavne službe i brisana je odredba da korištenje dozvole za rad-licence kontroliše nadležna kantonalna, odnosno Federalna poljoprivredna inspekcija, jer je ista propisana inspekcijskim nadzorom.

Članom 7. Zakona o izmjenama i dopunama Zakona o poljoprivrednim savjetodavnim službama pojednostavljuje se postupak registracije i početka rada privatnih poljoprivrednih savjetodavnih službi, kao i postupak objavljivanja liste odobrenih i brisanih poljoprivrednih savjetodavnih službi.

Članom 8. Zakona o izmjenama i dopunama Zakona o poljoprivrednim savjetodavnim službama precizira se postupak provođenja obuke, polaganja stručnog ispita i izdavanja certifikata za poljoprivrednog savjetodavca, na način da se uz odredbe važećeg Zakona dodaju i uslovi koje moraju ispunjavati visokoškolske ustanove i/ili stručne organizacije kojima se povjerava javno ovlaštenje za obavljanje poslova obuke, te način provjere njihove ispunjenosti. Ovim članom takođe se pojednostavljuje postupak objave liste odobrenih i brisanih poljoprivrednih savjetodavaca.

Članom 9. Zakona o izmjenama i dopunama Zakona o poljoprivrednim savjetodavnim službama precizira se postupak donošenja Programa teoretske i praktične obuke za certifikovanje poljoprivrednih savjetodavaca i Programa obavezne godišnje obuke poljoprivrednih savjetodavaca, kao i obaveze fizičkih lica i poljoprivrednih savjetodavaca koji prolaze obuke predviđene programima.

Članom 10. Zakona o izmjenama i dopunama Zakona o poljoprivrednim savjetodavnim službama precizira se organizacija i provođenje Programa teoretske i praktične obuke za certifikovanje poljoprivrednih savjetodavaca, polaganje stručnog ispita i izdavanje certifikata i organizacija i provođenje Programa obavezne godišnje obuke poljoprivrednih savjetodavaca.

U članu 11. Zakona o izmjenama i dopunama Zakona o poljoprivrednim savjetodavnim službama ugrađen je prijedlog Federalne uprave za inspekcijske poslove, radi usklađivanja sa zakonima o inspekcijama kantona i Zakonom o inspekcijama Federacije BiH ("Službene novine Federacije BiH" broj 73/14).

U članu 12. Zakona o izmjenama i dopunama Zakona o poljoprivrednim savjetodavnim službama razgraničene su nadležnosti kantonalne poljoprivredne inspekcije i federalne poljoprivredne inspekcije.

Članom 13. Zakona o izmjenama i dopunama Zakona o poljoprivrednim savjetodavnim službama reguliše se stupanje na snagu ovog propisa.

IV FINANSIJSKA SREDSTVA

Za donošenje i provođenje predmetnog Zakona nisu potrebna dodatna finansijska sredstva iz Budžeta Federacije BiH.

V USAGLAŠENOST PREDMETNOG ZAKONA O IZMJENAMA I DOPUNAMA ZAKONA O POLJOPRIVREDNIM SAVJETODAVNIM SLUŽBAMA SA ZAKONODAVSTVOM EVROPSKE UNIJE

Zakon o izmjenama i dopunama Zakona o poljoprivrednim savjetodavnim službama nije bio predmet usaglašavanja sa zakonodavstvom Evropske unije za ovu tematsku oblast.

Konsultacije u postupku izrade Zakona o izmjenama i dopunama Zakona o poljoprivrednim savjetodavnim službama i obrazloženje za prihvatanje, odnosno neprihvatanje dostavljenih primjedbi

PRIMJEDBE NA PREDNACRT ZAKONA O IZMJENAMA I DOPUNAMA ZAKONA O POLJOPRIVREDNIM SAVJETODAVNIM SLUŽBAMA

Izmjeni Zakona o poljoprivrednim savjetodavnim službama („Službene novine Federacije BiH“, broj 66/13) (u daljem tekstu: Zakon) pristupilo se radi otklanjanja nedostataka uočenih u postupku njegove primjene, kao i radi otklanjanja određenih tehničkih nedostataka.

Prednacrt zakona o izmjenama i dopunama Zakona o poljoprivrednim savjetodavnim službama dana 16.10.2017. godine dostavljen je: kantonalnim ministarstvima nadležnim za poslove poljoprivrede, Savezu općina i gradova Federacije Bosne i Hercegovine, Poljoprivredno - prehrambenom fakultetu Univerziteta u Sarajevu, Agronomskom i prehrambeno – tehnološkom fakultetu Sveučilišta u Mostaru, Agromediterranskom fakultetu univerziteta „Džemal Bijedić“ u Mostaru, Tehnološkom fakultetu Univerziteta u Tuzli, Tehnološkom fakultetu Evropskog univerziteta „Kallos“ u Tuzli, Biotehničkom fakultetu univerziteta u Bihaću, Federalnom zavodu za poljoprivredu Sarajevo, Federalnom agromediterranskom zavodu Mostar i Federalnom zavodu za agropedologiju. Federalnoj upravi za inspekcijske poslove nismo dostavljali, jer je ista prethodno dostavila svoj prijedlog, koji je ugrađen u tekst Prednacrt zakona o izmjenama i dopunama Zakona o poljoprivrednim savjetodavnim službama.

Tekst Prednacrt zakona o izmjenama i dopunama Zakona o poljoprivrednim savjetodavnim službama postavljen je na web stranicu Federalnog ministarstva poljoprivrede, vodoprivrede i šumarstva 13.10.2017. godine. Rok za dostavljanje primjedbi bio je 15 dana.

Nakon isteka roka dostavljene primjedbe, prijedlozi i sugestije su razmotrene. Prihvaćene su ugrađene u tekst Prednacrt zakona o izmjenama i dopunama Zakona o poljoprivrednim savjetodavnim službama, a za one koje nisu prihvaćene sačinjeno je obrazloženje.

U nastavku su date dostavljene primjedbe.

Primjedbe dostavio: Poljoprivredni zavod Tuzla

Primjedbe dostavljene: 27.10.2017. godine

- 1. Primjedba:** „Ako je poljoprivredna savjetodavna djelatnost skup mjera koje imaju za cilj povećanje nivoa znanja i poboljšanje praktičnih vještina poljoprivrednog proizvođača, kao što je naglašeno u članu 3. Zakona o savjetodavnim službama onda postavljam sljedeća pitanja: - Da li je cilj da imamo jedinstvenu savjetodavnu službu FBiH ili će ona biti razbijena po kantonima-županijama a bolesti, štetočine, protok roba, klima, ne poznaju kantonalne granice.“

Primjedba ne može da se prihvatiti.

Obrazloženje: Primjedba se ne može prihvatiti, jer nije dat konkretan prijedlog na predložene izmjene Zakona. Dostavljač primjedbe postavlja pitanje o jedinstvenoj poljoprivrednoj savjetodavnoj službi, a pri tom navodi oblasti koje su regulisane drugim propisima u Bosni i Hercegovini i Federaciji BiH. Osim toga, način na koji je uređena javna poljoprivredna savjetodavna služba u Federaciji BiH zasnovan je na zahtjevima nadležnih kantonalnih ministarstava i kantonalnih upravnih organizacija, između ostalih i Zavoda za poljoprivredu Tuzla.

- 2. Primjedba:** „U članu 1. Zakona o savjetodavnim službama govori se da se zakonom uređuje" Nadležnost vrste i finansiranja ..." - ako se finansiranja savjetodavnih službi vrši iz budžeta kantona to će dovesti do različite opremljenosti i nivoa znanja savjetodavca jer će sve navedeno zavisiti od finansijske moći kantona, razumijevanja i drugo onih koju upravljaju budžetom.“

Primjedba ne može da se prihvatiti.

Obrazloženje: Primjedba se ne može prihvatiti, jer nije dat konkretan prijedlog na tekst Prednacrta Zakona o izmjenama i dopunama Zakona o poljoprivrednim savjetodavnim službama. Primjedba se odnosi na organizaciju javne poljoprivredne savjetodavne službe u Federaciji BiH, definisanu Zakonom na način koji su u postupku donošenja predmetnog Zakona predložila kantonalna ministarstva nadležna za poslove poljoprivrede. Odredbe Zakona, koje se odnose na organizaciju javne poljoprivredne savjetodavne službe u Federaciji BiH nisu predmet izmjena Zakona. Primjedba Zavoda za poljoprivredu Tuzlanskog kantona je i ranije iznošena, ista se može riješiti na način da Zavod radi poslove propisane članom 5. Zakona, a poslove utvrđivanja činjeničnog stanja na terenu kantonalno ministarstvo može organizovati na drugi način.

- 3. Primjedba:** „u članu 4. govori se o izradi Srednjoročne strategije koju izrađuje komisija imenovana od strane federalnog ministra. Kako provoditi metode (propisane) savjetodavnog rada (član 6 . stav 6.) a finansijska sredstva za rad obezbjeđuju kantoni.“

Primjedba nije osnovana.

Obrazloženje: Primjedba nije opravdana, radi se o zapažanju davatelja primjedbe, jer je Zakonom propisano da Federalno ministarstvo finansira poslove iz svoje nadležnosti. Osim toga članom 13. Zakona predviđeno je sufinansiranje kantonalnih poljoprivrednih savjetodavnih službi od strane Federalnog ministarstva za izvršavanje određenih poslova. Članom 5. Prednacrta Zakona o izmjenama i dopunama Zakona o poljoprivrednim savjetodavnim službama propisan je način utvrđivanja tih poslova i planiranja potrebnih sredstava.

- 4. Primjedba:** „Trenutno stanje je slijedeće: Savjetodavni rad u F BiH ne postoji, na način kao što je propisano Članom 2. i Članom 5. - Javna - izvještajno - prognozna služba, poljoprivredno knjigovodstveni podaci (FADN), uzgojno selekcijski rad, stručno osposobljavanje inženjera-savjetodavaca, međusobna koordinacija i saradnja ne postoje ili ja njihov rad gotovo pa zanemarivih.! „

Primjedba nije osnovana.

Obrazloženje: Primjedba nije osnovana, jer većina poslova na koje se odnosi nije predmet Zakona o poljoprivrednim savjetodavnim službama. Osim toga je nejasna, jer nije navedeno na koje propise se odnose član 2. i član 5., jer oblasti navedene u nastavku primjedbe regulisane su drugim propisima u Bosni i Hercegovini i Federaciji BiH.

- 5. Primjedba:** „Sa ovakvim Zakonom o poljoprivrednim savjetodavnim službama nećemo moći vrednovati i podići dohodak poljoprivrednog gazdinstva a time provoditi zajedničku poljoprivrednu politiku EU.“

Primjedba ne može da se prihvatiti.

Obrazloženje: Dostavljač primjedbe istu nije obrazložio i nije poznato na čemu se zasniva.

- 6. Primjedba:** „Dodati novi stav: savjetodavci ne mogu utvrđivati činjenično stanje na terenu.
Dato je slijedeće obrazloženje vezano za primjedbu: Utvrđivanje činjeničnog stanja na terenu za Federalne novčane podrške oduzima puno vremena uposlenicima i ne ostavlja prostor za savjetodavni rad.“

Primjedba ne može da se prihvatiti.

Obrazloženje: Primjedba je opravdana, ali se ne može prihvatiti, jer problematika nije predmet Zakona, nego Zakona o novčanim podrškama u poljoprivredi i ruralnom razvoju („Službene novine Federacije BiH“, broj 42/10), u kojem je članom 27. stav (3) propisano da: „Kantonalna ministarstva i njihove stručne službe, odnosno kantonalni poljoprivredni zavodi, na osnovu Programa podrški i posebnog propisa za model podsticaja proizvodnji primaju zahtjeve, vrše provjeru dokumentacije, obrađuju zahtjeve i utvrđuju činjenično stanje na terenu.“

Kada se pokrene postupak izmjene i dopune Zakona o novčanim podrškama u poljoprivredi i ruralnom razvoju („Službene novine Federacije BiH“, broj 42/10) biće potrebno izmijeniti naprijed navedenu odredbu, jer će istu trebati uskladiti sa članom

13. Uredbe (EU) br. 1306/2013 Evropskog parlamenta i Vijeća od 17.12.2013. o finansiranju, upravljanju i nadzoru zajedničke poljoprivredne politike i o stavljanju van snage uredbe Vijeća (EZ) br. 352/78, (EZ) br. 165/94, (EZ) br. 2799/98, (EZ) br. 814/2000, (EZ) br. 1290/2005 i (EZ) br. 485/2008. Članom 13. tačka 2. Posebni zahtjevi koji se odnose na sistem savjetovanja poljoprivrednika, propisano je da: „Države članice obezbjeđuju odvajanje savjetovanja od kontrole.“

- 7. Primjedba:** „Primjedba na član 6.: dodati iza "Savjetodavne službe u svom radu koriste metode savjetodavnog rada utvrđivanjem činjeničnog stanja na terenu vrše službe Kantonalne inspekcije i ne mogu biti dio posla savjetodavca.“

Primjedba ne može da se prihvatiti.

Obrazloženje: Uzimajući u obzir propise u Federaciji BiH, kojim je uređen inspekcijski nadzor ovako formulisan prijedlog se ne može prihvatiti. Osim toga, razlog za neprihvatanje dat je u obrazloženju primjedbe broj 6.

- 8. Primjedba:** „Primjedba na član 7., dodati stav 3. „poslove utvrđivanja činjeničnog stanja na terenu, jer to nisu poslovi savjetodavnog rada već kontrolno - inspekcijskog.“

Primjedba ne može da se prihvatiti.

Obrazloženje: Uzimajući u obzir propise u Federaciji BiH, kojim je uređen inspekcijski nadzor ovako formulisan prijedlog se ne može prihvatiti. Osim toga razlog za neprihvatanje dat je u obrazloženju primjedbe broj 6.

- 9. Primjedba:** „Primjedba na član 9. stav (3) - Vidjeti mogućnost da se financiranje Kantonalnih savjetodavnih službi vrši iz budžeta F BiH.“

Primjedba je već djelimično prihvaćena.

Obrazloženje: Primjedba je već prihvaćena i obrazložena u primjedbi broj 3., s tim što se ne radi o finansiranju, nego sufinansiranju kantonalnih poljoprivrednih savjetodavnih službi.

Primjedbe dostavio: Federalni zavod za poljoprivredu Sarajevo

Primjedbe dostavljene: 31.10.2017. godine

- 1. Primjedba:** „Postojeći Zakon o poljoprivrednim stručnim službama („Sl. nov. FBiH“66/13) je neprovediv i traži izmjenu preko 50 % članaka. Mišljenja smo da trebamo pristupiti izradi novoga zakona.“

Primjedba ne može da se prihvatiti.

Obrazloženje: Pogrešno je naveden naziv zakona, osim toga mijenja se 38%

Zakona. Cilj izmjena je ispravljanje tehničkih greški i usklađivanje sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i Zakonom o inspekcijama Federacije Bosne i Hercegovine („Službene novine Federacije BiH“, broj 73/14). Organizacija javne poljoprivredne savjetodavne službe nije bila predmet izmjena Zakona.

Primjedbe dostavio: Federalni zavod za agropedologiju

Primjedbe dostavljene: 30.10.2017. godine

- 1. Primjedba:** „Zakon o poljoprivrednim stručnim službama („Sl. novine Federacije BiH“ broj 66/13) je teško provodiv, zbog čega je pokrenuta procedura za izmjenu Zakona. Prednacrt Zakona o izmjenama i dopunama Zakona o poljoprivrednim savjetodavnim službama traži izmjenu preko 50 % članova, zbog čega bi se trebalo pristupiti izradi novoga Zakona. U prilogu je dostavljen prijedlog Federalnog zavoda za poljoprivredu Sarajevo, Federalnog agromediterranskog zavoda Mostar i Federalnog zavoda za agropedologiju.“

Primjedba ne može da se prihvatiti.

Obrazloženje: Predlagač nije naveo tačan naziv zakona, nije Zakon o poljoprivrednim stručnim službama („Sl. novine Federacije BiH“ broj 66/13), nego Zakon o poljoprivrednim savjetodavnim službama, što je velika razlika. Osim toga mijenja se 38% Zakona. Većina izmjena odnosi se na ispravljanje tehničkih greški i usklađivanje sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i Zakonom o inspekcijama Federacije Bosne i Hercegovine („Službene novine Federacije BiH“, broj 73/14). Organizacija javne poljoprivredne savjetodavne službe nije bila predmet izmjena Zakona.

Primjedbu dostavio: Kantonalna uprava za inspekcijske poslove Zeničko – dobojskog kantona

Primjedbe dostavljene 31.10.2017.

„Član 13. Stav (1) (2)

- 1. Primjedba: Stav1. i stav 2. brisati**

Obrazloženje: Niti jedan zakon i propis ne definiše na ovakav način odnos (saradnju) između federalnih i kantonalni inspekcija.

Primjedba se prihvata.

2. Primjedba: Prijedlog izmjena teksta pomenutog člana:

Iza člana 24. Dodaje se novi član 24a. koji glasi

Član 24 a.

Federalni poljoprivredni inspektor u provođenju inspeksijskog nadzora nad primjenom odredbi ovog zakona i propisa doneseni na osnovu njega ovlašten je provoditi kontrolu: „Između ostalih tačaka uvrstiti: - obavlja sve poslove i zadatke u nadležnosti kantonalne poljoprivredne inspekcije ukoliko ova i iz bilo kojeg razloga ne izvršava poslove i zadatke utvrđene ovim zakonom i propisima doneseni na osnovu njega.“

Obrazloženje:

-posebno definisati ovlaštenja federalne poljoprivredne i kantonalne poljoprivredne inspekcije analogno drugim federalnim zakonima iz oblasti poljoprivrede (Zakon o slatkovodnom ribarstvu član 51; Zakon o poljoprivrednom zemljištu član 131 i 132; Zakon o sjemenu i sadnom materijalu poljoprivrednog bilja član 6. i drugi zakona)

-na sastancima radnih grupa koje su učestvovala u izradi odgovora na pitanje iz Upitnika evropske integracije dat je akcenat na definisanju nadležnosti različiti nivoa; federalni/kantonalni nivo.

Nedostatak kantonalnih poljoprivrednih inspektora u svim Upravama: nadležnost na provođenju velikog broja zakona i podzakonskih akata.“

Primjedba se prihvata.

Primjedbu dostavio: Federalni agromediteranski zavod Mostar

Primjedbe dostavljene: 31.10.2017. godine

- 1. Primjedba:** „S obzirom da je Zakon donesen 2012. godine i da smo uvidjeli da je njegova provedba upitna potrebno je pristupiti donošenju sasvim novog Zakona o poljoprivrednim savjetodavnim službama u Federaciji BiH.“

Davatelj primjedbe je dostavio: „nacrt (sadržaj) budućeg zakona“.

Primjedba se ne može prihvatiti.

Obrazloženje: Mijenja se 38% Zakona. Većina izmjena odnosi se na ispravljanje tehničkih greški i usklađivanje sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i Zakonom o inspekcijama Federacije Bosne i Hercegovine („Službene novine Federacije BiH“, broj 73/14). Organizacija javne poljoprivredne savjetodavne službe nije bila predmet izmjena Zakona.

Primjedbe dostavio: Savez općina i gradova Federacije Bosne i Hercegovine

Primjedbe dostavljene: 25.10.2017. godine

- 1. Primjedba:** Predsjedništvo skupštine Saveza općina i gradova F BiH donijelo je zaključak: Predsjedništvo skupštine Saveza općina i gradova F BiH podržava Prednacrt zakona o izmjenama i dopunama Zakona o poljoprivrednim savjetodavnim službama, kao dobru osnovu za izradu Nacrta zakona. U Nacrt zakona, što je više moguće, uvrstiti primjedbe jedinica lokalne samouprave sa područja Federacije Bosne i Hercegovine.

Sugestija se prihvata.

Primjedbe dostavio: Kantonalna uprava za inspekcijske poslove/Tuzlanski kanton

Primjedbe dostavljene: 06.11.2017. godine

- 1. Primjedba:** Da „Član 24 a. stav 1. glasi: Ako federalna poljoprivredna inspekcija utvrdi da kantonalna poljoprivredna inspekcija ne vrši ili nepravilno vrši inspekcijski nadzor iz člana 24. ovog Zakon, u tom slučaju federalna poljoprivredna inspekcija obavezna je sa tim upoznati vladu kantona i tražiti poduzimanje odgovarajućih mjera, kako bi kantonalna inspekcija vršila taj nadzor, a do početka rada kantonalne poljoprivredne inspekcije, taj inspekcijski nadzor vršit će federalna poljoprivredna inspekcija.“

Obrazloženje: Na ovaj način se vrši usklađivanje stava (1) „Člana 24a.“ Prednacrtu Zakona o poljoprivrednim savjetodavnim službama, kao *lex specialis* propisa, sa odredbom člana 134. stav (1) Zakona o organizaciji organa uprave u Federaciji Bosne i Hercegovine („Službene novine F BiH“, broj 35/05), koji kao opći propis predviđa pomenutu situaciju.

Primjedbe se prihvata.

- 2. Primjedba:** Da se u „članu 24a.“ stav (2), umjesto riječi „u okviru kojega je zaposlen postupajući federalni inspektor“, stoje riječi „u čiju nadležnost spada taj inspekcijski nadzor.“

Obrazloženje: Prema odredbi stava (1) „člana 24a.“ kako je definisano u Prednacrtu zakona o poljoprivrednim savjetodavnim službama, proizlazi da je postupajući federalni inspektor zaposlen u kantonalnom organu uprave za inspekcijske poslove, što je nemoguće i pravno nepostojeća situacija. Osim toga, na ovaj način se istovremeno vrši i usklađivanje stava (2) „člana 24a.“ Prednacrtu pomenutog zakona sa odredbama člana 134. stav (2) Zakona o organizaciji organa uprave u Federaciji Bosne i Hercegovine („Službene novine F BiH“, broj 35/05).

Primjedbe se prihvataju.

URED VLADE FEDERACIJE BOSNE I HERCEGOVINE ZA ZAKONODAVSTVO I USKLAĐENOST SA PROPISIMA EUROPSKE UNIJE

Mišljenje broj: 03-02/1-24-868/17 od 22.11.2017. godine

Ured Vlade Federacije Bosne i Hercegovine za zakonodavstvo i usklađenost s propisima Europske unije dostavio je slijedeće primjedbe na Prednacrt Zakona o izmjenama i dopunama Zakona o poljoprivrednim savjetodavnim službama:

„U članku 6. stavak (2) riječi: „U članku 16“. treba brisati. Na navedeni način potrebno je postupiti i u odredbama čl. 7. i 8. stavak (2), na način da je potrebno brisati riječi: „U članku 17.“, odnosno riječi: „U članku 18.“

U tekst Prednacrta Zakona o izmjenama i dopunama Zakona o poljoprivrednim savjetodavnim službama ugrađene su date primjedbe. Ured Vlade Federacije Bosne i Hercegovine za zakonodavstvo i usklađenost s propisima Europske unije potpisao je Izjavu o usklađenosti, kojom se potvrđuje da ne postoji odgovarajući propis Europske unije s kojim je potrebno uskladiti predmetni zakon.

FEDERALNO MINISTARSTVO PRAVDE

Mišljenje broj: 01/03-49-4660/17 od 20.11.2017. godine

Federalno ministarstvo pravde u pogledu pitanja iz svoje nadležnosti na osnovu odredbi članka 27. alineja 2. poslovnika o radu Vlade Federacije Bosne i Hercegovine, nije imalo primjedbi na tekst Prednacrta Zakona o izmjenama i dopunama Zakona o poljoprivrednim savjetodavnim službama.

FEDERALNO MINISTARSTVO FINANSIJA

Mišljenje broj: 06-14-3-7765-1/17 od 06.12.2017. godine

Federalno ministarstvo finansija u okviru svoje nadležnosti, prema Poslovniku o radu Vlade Federacije BiH iz člana 27. stav 1. nije imalo primjedbi na tekst Prednacrta Zakona o izmjenama i dopunama Zakona o poljoprivrednim savjetodavnim službama.

FEDERALNA UPRAVA ZA INSPEKCIJSKE POSLOVE

Mišljenje broj: 12-24-6-06708/2017-12-2 od 29.11.2017. godine

Federalna uprava za inspekcijske poslove nije imala primjedbi na test Prednacrta Zakona o izmjenama i dopunama Zakona o poljoprivrednim savjetodavnim službama.

PRIMJEDBE NA NACRT ZAKONA O IZMJENAMA I DOPUNAMA ZAKONA O POLJOPRIVREDNIM SAVJETODAVNIM SLUŽBAMA

Dom naroda Parlamenta Federacije Bosne i Hercegovine na 22. sjednici održanoj 10.05.2018. godine usvojio je zaključak, kojim se zadužuje Federalno ministarstvo

poljoprivrede, vodoprivrede i šumarstva da organizuje i provede javnu raspravu u postupku pripreme Prijedloga zakona o izmjenama i dopunama Zakona o poljoprivrednim savjetodavnim službama.

Poziv na Javnu raspravu 11.06.2018. godine bio je upućen: kantonalnim ministarstvima nadležnim za poslove poljoprivrede, Odboru za poljoprivredu, vodoprivredu i šumarstvo Doma naroda Parlamenta Federacije Bosne i Hercegovine, Odboru za poljoprivredu, vodoprivredu i šumarstvo Zastupničkog Parlamenta Federacije Bosne i Hercegovine, Zadružnom savezu Federacije Bosne i Hercegovine, Savezu općina i gradova Federacije Bosne i Hercegovine, Federalnom zavodu za poljoprivredu Sarajevo, Federalnom agromediteranskom zavodu Mostar, Federalnom zavodu za agropedologiju, Poljoprivredno–prehrambenom fakultetu Univerziteta u Sarajevu, Agronomskom i prehrambeno –tehnološkom fakultetu Sveučilišta u Mostaru, Agromediteranskom fakultetu - Univerzitet „Džemal Bijedić“ Mostar, Tehnološkom fakultetu Univerziteta u Tuzli, Biotehničkom fakultetu Univerziteta u Bihaću. Takođe je na službenoj Internet stranici Federalnog ministarstva poljoprivrede, vodoprivrede i šumarstva 12.06.2018. godine stavljena obavijest kojom se pozivaju svi zainteresovani da učestvuju u Javnoj raspravi ili da svoje primjedbe dostave do 03.07.2018. godine.

Javna rasprava je održana dana 20.06.2018. godine u prostoriji Federalnog ministarstva poljoprivrede, vodoprivrede i šumarstva.

Javnoj raspravi su prisustvovali predstavnici: Federalnog zavoda za poljoprivredu Sarajevo, Federalnog agromediteranskog zavoda Mostar, Federalnog zavoda za agropedologiju, Ministarstva poljoprivrede, šumarstva i vodoprivrede Hercegovačko – neretvanskog kantona, Ministarstva privrede kantona Sarajevo, Ministarstva poljoprivrede, vodoprivrede i šumarstva Srednjobosanskog kantona/Kantona Središnja Bosna, Ministarstva poljoprivrede, šumarstva i vodoprivrede Zeničko – dobojskog kantona, Ministarstva poljoprivrede, vodoprivrede i šumarstva Posavskog kantona i Ministarstva gospodarstva Zapadnohercegovačkog kantona.

Pozivu se nisu odazvali: predstavnici ministarstva nadležnih za poslove poljoprivrede: Unsko–sanskog kantona, Kantona 10, Bosansko–podrinjskog kantona Goražde i Tuzlanskog kantona, Odbora za poljoprivredu, vodoprivredu i šumarstvo Doma naroda Parlamenta Federacije Bosne i Hercegovine, Odbora za poljoprivredu, vodoprivredu i šumarstvo Zastupničkog Parlamenta Federacije Bosne i Hercegovine, Zadružnog saveza Federacije Bosne i Hercegovine, Saveza općina i gradova Federacije Bosne i Hercegovine, Poljoprivredno–prehrambenog fakulteta Univerziteta u Sarajevu, Agronomskog i prehrambeno–tehnološkog fakulteta Sveučilišta u Mostaru, Agromediteranskog fakulteta - Univerziteta „Džemal Bijedić“ Mostar, Tehnološkog fakulteta Univerziteta u Tuzli, Biotehničkog fakulteta Univerziteta u Bihaću.

Zvonko Barišić, Zavod za poljoprivredu Zapadnohercegovačkog kantona konstatovao je da su predložene izmjene tehničke i da nije bilo suštinskih izmjena Zakona.

Predstavnik Federalnog agromediteranskog zavoda Mostar, Mario Leko, postavio je slijedeće pitanje: „Je li razmatran prijedlog koji su dostavili Federalni

agromediteranski zavod Mostar i Federalni zavod za poljoprivredu Sarajevu, a koji se odnosi na organizaciju javne poljoprivredne savjetodavne službe u Federaciji BiH?“

Predstavnik Federalnog ministarstva poljoprivrede, vodoprivrede i šumarstva odgovorio je da je dostavljeni prijedlog razmatran i da on zahtijeva izradu sasvim novog zakona, a Federalno ministarstvo poljoprivrede, vodoprivrede i šumarstva pokrenulo je izmjene i dopune Zakona o poljoprivrednim savjetodavnim službama, kako bi se otklonili nedostaci uočeni u postupku primjene važećeg Zakona. Dodao je da se procjeni primjene važećeg Zakona može pristupiti kada isti u potpunosti bude implementiran, odnosno kada budu uspostavljeni svi registri predviđeni Zakonom. Za procjenu primjene Zakona i eventualnih većih izmjena potrebno je uraditi analize u pogledu razgraničenja poslova stručnih službi predviđenih i formiranih na osnovu drugih zakona u Bosni i Hercegovini i Federaciji BiH, analizu zakonodavstva u Bosni i Hercegovini, Federaciji BiH i kantonima, kojim se propisuju obaveze poljoprivrednika i područja savjetovanja, znati obavezna područja savjetovanja u EU, te uslova koje moraju ispuniti savjetodavne službe da bi ih mogle pružati savjetodavne usluge u tim područjima. Za sve naprijed navedene poslove potrebno je potražiti tehničku pomoć, kroz TAIX ili druge instrumente EU ili nekih drugih organizacija.

Perica Bulić, direktor Zavoda za poljoprivrednu savjetodavnu službu i zaštitu bilja, konstatovao je da je pitanje organizacije poljoprivredne savjetodavne službe bilo predmet rasprave u postupku donošenja važećeg Zakona i da se mora poštovati nadležnost svih nivoa vlasti u vršenju poslova poljoprivredne savjetodavne službe.

Predstavnik Federalnog zavoda za poljoprivredu Sarajevo, Enes Smajlović, postavio slijedeće pitanje: „Zašto nisu izvršene izmjene odredbi koje se odnose na savjetodavnu djelatnost, korištene izraze kao što su „biljne štetočine“ i zašto nisu u javnu savjetodavnu službu uključeni federalni zavodi.“

Predstavnik Federalnog ministarstva poljoprivrede, vodoprivrede i šumarstva odgovorio je da su pitanja termina kao što su „biljne štetočine“ predmet drugih propisa, a važeća organizacija javne poljoprivredne savjetodavne službe u Federaciji BiH je definisana u postupku donošenja važećeg Zakona.

Predstavnik Federalnog ministarstva poljoprivrede, vodoprivrede i šumarstva zamolio je prisutne da radi važnosti i točnog navođenja primjedbi svoje primjedbe dostave na adresu: savjetodavna@fmpvs.gov.ba do 02.07.2018. godine ili pismeno na adresu Federalnog ministarstva poljoprivrede, vodoprivrede i šumarstva.

Primjedbe sugestije dostavljene nakon Javne rasprave

Primjedbe dostavio: Federalni zavod za poljoprivredu Sarajevo

Primjedbe dostavljene: 02.07.2018. godine

Primjedba: „Postojeći Zakon o poljoprivrednim stručnim službama („Službene novine Federacije BiH“, broj 66/13) je neprovodiv i traži izmjenu preko 50% članova. Mišljenja smo da trebamo pristupiti izradi novog zakona.“

Primjedba ne može da se prihvatiti.

Obrazloženje: Mijenja se 38% Zakona. Cilj izmjena je ispravljanje tehničkih greški i usklađivanje sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i Zakonom o inspekcijama Federacije Bosne i Hercegovine („Službene novine Federacije BiH“, broj 73/14). Organizacija javne poljoprivredne savjetodavne službe nije bila predmet izmjena Zakona.

Primjedbe dostavio: Federalni zavod za agropedologiju

Primjedbe dostavljene: 02.07.2018. godine

Primjedba: „Postojeći Zakon o poljoprivrednim stručnim službama („Službene novine Federacije BiH“, broj 66/13) je neprovediv i traži izmjenu preko 50% članaka. Mišljenja smo da trebamo pristupiti izradi novoga zakona.“

Primjedba ne može da se prihvatiti.

Obrazloženje: Mijenja se 38% Zakona. Cilj izmjena je ispravljanje tehničkih greški i usklađivanje sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i Zakonom o inspekcijama Federacije Bosne i Hercegovine („Službene novine Federacije BiH“, broj 73/14). Organizacija javne poljoprivredne savjetodavne službe nije bila predmet izmjena Zakona.

Primjedbe dostavio: Poljoprivredni zavod Tuzla

Primjedbe dostavljene: 27.06.2017. godine

Primjedba: „Predlažemo da se u Zakonu o poljoprivrednim savjetodavnim službama, „Službene novine F BiH“, broj 66/13) u članu 13. Poslovi od posebnog značaja za BiH i Federaciju (Tržišno – informacioni sistem, FADN i dr. Poslovi) finansiraju iz Budžeta Federacije BiH – Federalnog ministarstva 100%.“

Primjedba ne može da se prihvatiti.

Obrazloženje: Primjedba se ne može prihvatiti, jer je Zakonom propisano da svaki nivo vlasti finansira poslove iz svoje nadležnosti, ovo su poslovi od podjednakog značaja za Bosnu i Hercegovinu, Federaciju BiH i kantone, te je predviđeno da se isti finansiraju 50% Federacija BiH – Federalno ministarstvo poljoprivrede, vodoprivrede i šumarstva i 50% kantoni – nadležna kantonalna ministarstva.

URED VLADE FEDERACIJE BOSNE I HERCEGOVINE ZA ZAKONODAVSTVO I USKLAĐENOST SA PROPISIMA EVROPSKE UNIJE

Mišljenje broj: 03-02/1-24-656/18 od 30.07.2018. godine

Ured Vlade Federacije Bosne i Hercegovine za zakonodavstvo i usklađenost s propisima Evropske unije dostavio je slijedeće primjedbe na Nacrt Zakona o izmjenama i dopunama Zakona o poljoprivrednim savjetodavnim službama:

„U članu 12. st. (2) i (4) termin: „nađe“ potrebno je zamijeniti adekvatnijim terminom kao npr. „utvrđi“, „konstatuje“ itd.

U članu (2) tačka 3. istog člana trebalo bi preispitati, odnosno precizirati koje su to druge mjere, odnosno druge radnje koje federalni poljoprivredni inspektor ima pravo i obavezu da preduzme, odnosno obavlja, a za koje je posebnim propisom ovlašten, tj. kojim propisom je ovlašten.

U istom članu, kojim se mijenja član 24., potrebno je tačke označiti malim slovima abecede, u skladu sa članom 32. stav (2) Pravila i postupaka za izradu zakona i drugih propisa Federacije Bosne i Hercegovine („Službene novine Federacije BiH“, broj 71/14), a ne arapskim brojevima.

U dijelu koji se odnosi na usklađenost predmetnog zakona sa zakonodavstvom Evropske unije napomenuto je da obrađivač ima obavezu sačiniti i Uredu za zakonodavstvo Vlade Federacije Bosne i Hercegovine i usklađenost s propisima Evropske unije dostaviti Izjavu o usklađenosti, u skladu sa članom 5. Uredbe o postupku usklađivanja zakonodavstva Federacije Bosne i Hercegovine s pravnom stečevinom Evropske unije („Službene novine Federacije BiH“, broj 98/16).

U tekst Nacrta zakona o izmjenama i dopunama Zakona o poljoprivrednim savjetodavnim službama ugrađene su sve date primjedbe.

Ured Vlade Federacije Bosne i Hercegovine za zakonodavstvo i usklađenost s propisima Evropske unije potpisao je Izjavu o usklađenosti, koja je dostavljena uz tekst Prednacrta Zakona o izmjenama i dopunama Zakona o poljoprivrednim savjetodavnim službama, Mišljenje broj: 03-02/1-24-868-2/17 od 5.12.2017. godine, te smo smatrali da nije neophodno istu dostavljati uz Nacrt predmetnog Zakona.

FEDERALNO MINISTARSTVO FINANSIJA

Mišljenje broj: 06-14-3-4738/18 od 30.07.2018. godine

Federalno ministarstvo finansija u okviru svoje nadležnosti, prema Poslovniku o radu Vlade Federacije BiH iz člana 27. stav 1. nije imalo primjedbi na tekst Nacrta zakona o izmjenama i dopunama Zakona o poljoprivrednim savjetodavnim službama.

FEDERALNO MINISTARSTVO PRAVDE

Mišljenje broj: 01/03-49-3716/18 od 22.10.2018. godine

Federalno ministarstvo pravde dostavilo je primjedbu na tekst Nacrta zakona o izmjenama i dopunama Zakona o poljoprivrednim savjetodavnim službama koja glasi: „Ističemo primjedbu na odredbu iz člana 12. kojim se mijenja član 24. postojećeg Zakona. Prevažodno, u odredbama iz stava 5., i 6. navedenog člana, potrebno je precizirati predloženu normu na način da se jasno i bez nedoumica utvrdi pravo na žalbu protiv rješenja kantonalnog, odnosno federalnog inspektora koji vrše nadzor nad provedbom ovog zakona, i to na način da se utvrdi na koje rješenje ovih inspektora se odnosi predmetna žalba. Takođe, smatramo da je odredba iz stava 7. navedenog člana suvišna, te da je istu potrebno brisati iz nacrta zakona.“

Predložena primjedba je prihvaćena, s tim da je brisan stav (6) člana 12. kojim se mijenja član 24. važećeg Zakona, a ne stav (7) istoga člana, kako je predloženo.

Obrazloženje: U stavu (2) tačka a) člana 12. kojim se mijenja član 24. važećeg Zakona propisano je da federalni inspektor ima pravo i obavezu da rješenjem naredi otklanjanje utvrđenih nedostataka, odnosno nepravilnosti u određenom roku ukoliko utvrdi da je povrijeđen ovaj Zakon ili drugi propis donesen na osnovu njega. Radi usklađivanja s navedenom odredbom brisan je stav (6), a ne stav (7) istog člana, jer je u stavu (6) istog člana propisano da se protiv rješenja Federalne uprave za inspekcijske poslove može uložiti žalba Federalnom ministarstvu u roku od osam dana od dana prijema rješenja, a u stavu (7) istog člana propisano je da se protiv rješenja federalnog poljoprivrednog inspektora može uložiti žalba Federalnom ministarstvu u roku od osam dana od dana prijema rješenja.

PRIJEDLOG ZAKONA

Vlada Federacije Bosne i Hercegovine je na 238. redovnoj sjednici, održanoj 01.10.2020. godine, utvrdila Prijedlog zakona o izmjenama i dopunama Zakona o poljoprivrednim savjetodavnim službama i predložila da se u članu 19. stav (3) izmjeni odredba kojom su certifikovani poljoprivredni savjetodavci u svrhu permanentnog sticanja znanja dužni da prolaze obaveznu obuku svake godine na način, da su savjetodavci dužni obaveznu obuku da prođu jednom u tri godine.

Prijedlog je prihvaćen i stav (3) člana (19) glasi: „Certifikovani savjetodavci u svrhu permanentnog sticanja znanja prolaze obaveznu obuku jednom u tri godine, u skladu sa Programom obavezne obuke poljoprivrednih savjetodavaca, koji donosi federalni ministar.“